

General-major Bernhard Bair, komandant EUFOR-a

OSBiH se veoma dobro pripremaju za Afganistan

● Ispunjenje uslova za MAP postavljenog u Tallinnu o rješavanju pitanja perspektivne nepokretne vojne imovine vrlo lako bi se moglo riješiti, uz samo malo volje ● Za sada bez smanjenja broja pripadnika EUFOR-a ● Pomoć u izgradnji kapaciteta i obuci OSBiH

Razgovarao: Daniel OMERAGIĆ

• Kako ocjenjujete trenutnu sigurnosnu situaciju u Bosni i Hercegovini?

- Što se sigurnosne situacije tiče, sa naše tačke gledišta Bosna i Hercegovina je sigurna i stabilna. Također, vidim i neke pozitivne razvoje političke situacije, naročito kada uzmemo u obzir ulazak BiH u Akcioni plan za članstvo u NATO (MAP). Ostao je da se napravi još jedan mali korak do potpunog uspjeha ulaska u MAP, a to je da se riješi pitanje perspektivne nepokretne vojne imovine. Mislim da bi to vrlo lako moglo da se riješi uz samo malo volje u BiH. Kada je riječ o pozitivnim pomacima na političkom planu, sa strane Evropske unije uskoro bi trebalo doći do odobravanja liberalizacije viznog režima za građane Bosne i Hercegovine. Moram spomenuti i nedavni sastanak u Sarajevu na visokom nivou EU - zapadni Balkan sa kojeg su sve delegacije posle pozitivnog signala, koji znači da mi zaista želimo vidjeti Bosnu i Hercegovinu na putu ka članstvu u Evropskoj uniji i Sjevernoatlantskom savezu.

Političari na potezu

• Vjerujete li da bi Bosna i Hercegovina u septembru mogla započeti svoj prvi godišnji ciklus iz MAP-a?

- To zavisi od vaših političara. Što se NATO-a tiče, sve je spremno i samo se čeka na to da ovdašnji političari obave svoj dio posla. Mislim da bi to trebalo uraditi čim prije je moguće, jer to šalje veoma pozitivnu poru-

ku o BiH, a povećava i nivo njene sigurnosti.

• Prilikom preuzimanja dužnosti od dosadašnjeg komandanta NATO-štaba u Sarajevu brigadnog generala Johna W. Bullarda, novi komandant brigadni general David Enyeart je naglasio da će nastaviti pružati podršku Ministarstvu odbrane i Oružanim snagama BiH, kao i saradnju sa EUFOR-om i međunarodnom

AUSTRIJANCI UMJESTO ŠPANACA
Austrijanci će svojim kontingentom zamijeniti španski, tako da ćemo zadržati nivo snaga koji iznosi nešto više od dvije hiljade pripadnika EUFOR-a. Sta će biti iduće godine, još ne znamo. To zavisi od onog šta će se dešavati u BiH

zajednicom. U kojim konkretnim poljima se odvija taj zajednički rad?

- Ta saradnja uvijek je postojala, a i general Bullard je tokom primopredaje dužnosti podsjetio na nju. Ovdje u Butmiru možete vidjeti da smo blisko povezani, čak dijelimo istu zgradu, sjedimo jedni do drugih i svakodnevno nas dvojica održavamo sastanke, kao i naše osoblje. Vrlo važno je napomenuti da lanac komandovanja EUFOR-a, jednako onom koji

ide iznad NATO-štaba u Sarajevu, završavaju na istom mjestu. To će vam biti jasnije ako vam kažem da je moj operativni komandant u isto vrijeme i zamjenik komandanta savezničkih snaga za Evropu, dakle zamjenik komandanta NATO-a. Razlog za to je što je misija EUFOR-a jedina koja se odvija unutar tzv. Berlin plus aranžmana. To znači da nam NATO pruža direktnu podršku na terenu u ispunjavanju zadataka i ostvarivanju misije. Prema tome, sa najvišeg političkog nivoa dolazi ne samo volja za saradnju između NATO-a i Evropske unije nego i vrlo čvrst nalog. Možete vidjeti i da se veoma često sastaju visoka predstavništva za vanjske odnose i sigurnosnu politiku EU Catherine Ashton i generalni sekretar NATO-a Anders Fogh Rasmussen. Mi smo zaduženi da tu političku volju sa najvišeg nivoa pretočimo u djelo i to svakodnevno radimo. Postoji još jedno područje gdje NATO-štab u Sarajevu i EUFOR blisko saraduju. Riječ je o novoj misiji EUFOR-a na pružanju pomoći Oružanim snagama BiH u izgradnji kapaciteta i obuci. NATO tu vrstu poslova obavlja na strateškom i operativnom nivou, dok je EUFOR na sebe preuzeo da pomaže Oružanim snagama na nižem, taktičkom nivou. NATO-štab u Sarajevu i EUFOR odmah razmjenjuju i sve informacije koje jedni ili drugi prikupimo o sigurnosnoj situaciji u BiH kako bismo imali potpuni pregled.

• **Vojna operacija EUFOR ALTHEA je pokrenuta u decembru 2004. nakon odluke NATO-a da okonča svoju misiju SFOR-a i poslije usvajanja Rezolucije 1575 Vijeća sigurnosti, kojom se odobrava razmještanje vojnih snaga Evropske unije u Bosni i Hercegovini. U posljednje vrijeme, međutim, sve se češće govori o smanjenju broja pripadnika EUFOR-a.**




Foto: S. GUBELIĆ

- Za sada neće biti smanjivanja. Mogu vam reći da ćemo zadržati trenutni nivo snaga, iako se španski kontingent povlači iz sastava EUFOR-a. Austrijanci će svojim kontingentom zamijeniti španski, tako da ćemo zadržati nivo snaga koji iznosi nešto više od dvije hiljade pripadnika EUFOR-a. Šta će biti iduće godine, još ne znamo. To zavisi od onog šta će se dešavati u Bosni i Hercegovini, jer ako ostvarite veći napredak, nama je onda lakše da smanjimo nivo prisustva. Naš fokus će se u mnogome usmjeriti i na novu misiju pružanja pomoći Oružanim snagama BiH u izgradnji kapaciteta i obuci. Ne znam da li ste primijetili da među zastavama zemalja koje učes-

tvuju u misiji imamo i jednu novu staru. To je češka zastava. Dakle, Česi su se već vratili da sudjeluju u pomoći Oružanim snagama BiH. Također, i Švedska se vraća, tako da ćemo na kraju imati 27 zemalja učesnika u misiji. Tako i sami možete vidjeti da je među zemljama Evropske unije jako popularno da šalju svoje vojnike u Bosnu i Hercegovinu kako bi učestvovali u novoj misiji EUFOR-a.

Odličan posao

• **Kakva je Vaša procjena trenutnih sposobnosti i nivoa obučenosti Oružanih snaga BiH?**

- Trenutno Oružane snage BiH vrše jako dobar posao na pripremi za odlazak u misiju ISAF u Afganistanu. Zaista mi je drago što je Predsjedništvo BiH donijelo odluku o tome da se pripadnici OS-a pridruže toj misiji. Apsolutno sam siguran da će oni uraditi odličan posao. Svi mi podržavamo Bosnu i Hercegovinu u obuci za nove zadatke.



TAKOREČI... IGNORISANJE

Boračka organizacija RS-a uputila je juče pismo OHR-u i ambasadama Rusije, SAD-a i Velike Britanije u BiH u kojem je navela da premijer Vlade FBiH Mustafa Mujezinović uporno odbija da organizuje sastanak sa Timom Vlade RS-a za koordinaciju aktivnosti istraživanja ratnih zločina i traženje nastalih lica. Ova organizacija ističe da se Mujezinović uporno oglašuje na njihove pozive, navodeći da njegovo ponašanje jedino mogu okarakterisati kao ignorisanje srpskih žrtava koje su ubijene tokom rata u Sarajevu.